

PELUANG PENGAJIAN SISWAZAH DI UNIVERSITI PUTRA MALAYSIA

- Arbaiyah Mohd Isa

Selaras dengan kehendak negara, Universiti Putra Malaysia (UPM) membuka peluang kepada semua yang berkelayakan dan berminat untuk melanjutkan pengajian mereka ke peringkat PASCA siswazah. Peluang ini bukan sahaja dimanfaatkan oleh warga negara Malaysia sahaja, bahkan juga mereka yang dari negara-negara lain. Program PASCA siswazah atau ijazah lanjutan di Universiti Putra Malaysia sebenarnya bermula pada tahun 1975. Ia merupakan sebahagian daripada usaha universiti untuk mewujudkan keadaan di mana masyarakat dapat menikmati, menghayati, mengetahui dan menghasilkan ilmu dengan mudah. Matlamatnya ialah untuk memberi peluang kepada pelajar-pelajar untuk meningkatkan pengajian dan kemahiran yang lebih tinggi, memberi pendedahan kepada mereka membuat kajian atau penyelidikan secara bebas serta mewujudkan semangat menimba ilmu sebanyak yang mungkin.

Untuk mengkoordinasikan dan mengawasi mutu pelbagai program dan bidang yang ditawarkan, UPM telah menubuhkan Pusat Pengajian Siswazah yang diketuai oleh seorang Dekan. Pusat juga bertanggungjawab menyebarkan maklumat mengenai program, memproses permohonan dan mengawasi pengajian semua pelajar berjalan dengan teratur dan menurut peraturan yang disediakan. Ramai juga pelajar yang tidak mempunyai penganjur untuk mengikuti pengajian mereka. Walau pun terhad, Pusat juga mempunyai peranan dalam menyelaras bantuan biasiswa dan bantuan kewangan lain.

Pengalaman UPM dalam pengajian ijazah lanjutan selama 20 tahun telah berjaya mengeluarkan lebih daripada 1,400 graduan Masters dan Doktor Falsafah dalam pelbagai bidang sains dan teknologi dan sains sosial. Ramai dari kalangan mereka ini telah menjadi para saintis, akademik dan profesional yang berjaya hari ini. UPM juga berjaya menarik minat pelajar-pelajar dari 44 buah negara termasuk negara yang telah membangun seperti Jepun dan Amerika Syarikat. Setakat bulan Ogos 1998, jumlah pelajar ijazah lanjutan di UPM adalah seramai 3,041 orang yang mana 502 orang daripadanya adalah pelajar dari luar negara. Tren menunjukkan bahawa jumlah ini akan makin bertambah terutama sekali dengan adanya bidang-bidang baru yang akan diperkenalkan.

UPM sekarang ini menawarkan pelbagai bidang utama pengajian ijazah lanjutan yang merangkumi bidang-bidang seperti sains gunaan, sains komputer, teknologi maklumat, pertanian, sains makanan, bioteknologi, perhutanan, perubatan veterinar, kejuruteraan, pengajian pendidikan, pengajian bahasa moden, perubatan, kesihatan komuniti, komunikasi, ekonomi, senibina dan lanskap, dan pengurusan serta pembangunan manusia.

Beratus sub-bidang telah ditawarkan bawah bidang-bidang utama ini. Usaha masih di pertingkatkan lagi untuk mengenal pasti sub-bidang-sub-bidang baru untuk menampung keperluan pendidikan negara dan rantau ini.

Bergantung kepada minat dan matlamat, pelajar boleh memilih jenis tatacara pengajian yang ingin diikuti. Program-program yang ditawarkan mempunyai cukup pilihan yang boleh dibuat oleh calon. Dalam pengendalian program-programnya, UPM telah menggunakan tiga pendekatan utama, iaitu berdasarkan penyelidikan dan penghasilan tesis, kerja-kursus atau kedua-duanya sekali. Bagi mereka yang ingin menjadi seorang penyelidik yang berkualiti, pendekatan yang patut digunakan ialah melalui penyelidikan dan tesis. Program yang dilaksanakan melalui kursus sahaja adalah bertujuan untuk membolehkan pelajar meningkatkan pengetahuan dan kemahiran profesionalisme mereka. Kursus-kursus dikendalikan dan projek-projek penyelidikan diseliaikan oleh pakar-pakar yang berkelayakan dan berpengalaman. Kemudahan dan alat-alat yang digunakan adalah moden dan canggih standing dengan pusat-pusat kecemerlangan lain. Selain dari itu, untuk memantapkan lagi kualiti pengajian atau penyelidikan, pemeriksa-pemeriksa luar juga dilantik untuk membuat penilaian ke atas prestasi pelajar.

Ijazah-ijazah yang ditawarkan termasuklah Master Sains, Master Alam Sekitar, Master Ekonomi, Master Pentadbiran Perniagaan, Master Perubatan Veterinar, Master Sains Veterinar, Master Sains Pertanian, Master Sastera, Master Senibina Landskap dan Doktor Falsafah.

Untuk menyertai sesuatu program Master, seseorang calon hendaklah mempunyai sekurang-kurangnya Ijazah Sarjana Muda Peringkat Kelas Dua Atas atau yang setara dengannya. Calon yang tidak mempunyai kelayakan di atas tetapi mempunyai pengalaman yang mencukupi serta sesuai dengan bidang yang dipohon boleh juga dipertimbangkan.

Bagi mereka yang ingin mengikuti program kedoktoran, calon hendaklah mempunyai Ijazah Master daripada UPM atau universiti-universiti lain yang diiktiraf. Selain daripada itu, seseorang calon juga perlu menunjukkan kemahiran dan keupayaan untuk menjalani penyelidikan serta boleh berdikari.

Jangkamasa pengajian bagi menamatkan program pengajian bergantung kepada status pendaftaran (sepenuh atau separuh masa) dan kemajuan seseorang pelajar dalam kerja kursus dan penyelidikan. Tempoh minima bagi menamatkan program Master adalah dua semester (satu tahun) dan bagi program kedoktoran adalah empat semester (dua tahun).

Bahasa pengajian bagi semua ijazah lanjutan ialah sama ada Bahasa Inggeris atau

Bahasa Malaysia atau kedua-duanya sekali. Pada masa ini, kebanyakan pelajar yang mendaftar, menggunakan Bahasa Inggeris sebagai bahasa pengajaran. Pelajar-pelajar antarabangsa dikehendaki mengambil Bahasa Malaysia di peringkat yang minima yang dapat membantu mereka untuk berkomunikasi.

Secara umumnya, yuran asas bagi ijazah Master ialah sebanyak RM 1,400 setahun dan ijazah Kedoktoran sebanyak RM 2,400 setahun. Pelajar-pelajar antarabangsa dikehendaki membayar yuran, tambahan sebanyak RM 1,000 setahun. Selain daripada yuran asas di atas, pelajar-pelajar yang mengambil ijazah Master dalam bidang tertentu dikehendaki membayar yuran tambahan yang telah ditetapkan oleh fakulti berkenaan. Pelajar yang membuat tesis, perlu juga membayar yuran peperiksaan pada semester terakhir pengajian mereka. Kadar yuran ini tertakluk kepada perubahan dari masa ke semasa.

UPM ada menawarkan beberapa bantuan kewangan kepada pelajar ijazah lanjutan melalui Skim Siswazah Pembantu dan Skim PASCA. Bantuan tersebut hanya untuk pelajar-pelajar yang membuat kajian/penyelidikan dalam bidang-bidang tertentu sahaja. Pelajar-pelajar yang menerima bantuan tersebut dikecualikan daripada yuran tertentu dan mereka juga dikehendaki membantu dalam tugas-tugas pengajaran dan penyelidikan selama enam jam seminggu.

Selain daripada bantuan di atas, institusi antarabangsa seperti "Southeast Asian Research Centre in Agriculture (SEARCA) dan WINROCK juga ada menawarkan biasiswa kepada pelajar-pelajar ijazah lanjutan. Agensi Kerajaan seperti MARA dan Jabatan Perkhidmatan Awam juga ada menawarkan pinjaman kepada pelajar-pelajar.

Program ijazah lanjutan menerima kemasukan sebanyak dua kali setahun, iaitu pada Semester Mei dan Semester November. Permohonan hendaklah dibuat dengan menggunakan borang yang boleh didapati dari Pusat Pengajian Siswazah atau melalui internet (<http://www.gso.upm.edu.my>).

Borang permohonan yang lengkap hendaklah sampai ke Pusat Pengajian Siswazah sebelum 28 Februari bagi kemasukan Semester Mei dan 30 Ogos bagi kemasukan Semester November. Salinan-salinan dokumen seperti ijazah, diploma, transkrip peperiksaan serta dokumen akademik yang lain perlu disahkan dan dikemukakan bersama-sama permohonan.

Pemohon-pemohon yang ditawarkan biasiswa atau pembiayaan bagi pengajian mereka hendaklah juga mengemukakan bukti-butki mengenai pembiayaan tersebut. Setiap permohonan perlu disertakan dengan yuran permohonan sebanyak RM 25 melalui wang kiriman pos dan dibayar kepada Dekan, Pusat Pengajian Siswazah. Yuran tidak akan dikembalikan sekiranya permohonan itu tidak berjaya.